

«Գիւղը ապրում է սովի ճիրաններում, գրում էին Վերին-Ղարանլու-
խից «Հայաստանի Աշխատուոր»-ին (25 ապր.) : Սրանից մի քանի օր առաջ
մի գաղթական սովածութիւնից մեռաւ տեղացի Սաչատուրի դուռնը : Շատե-
րը, տեղացի թէ գաղթական, հապճեպ փախչում են էս կողմն-էն կողմը,
որպէսզի մի կտոր չոր հաց ճարեն : Սրանից 3 օր առաջ 3 հոգի գաղթական
սովածութիւնից ճանապարհին մեռել են, այնպէս որ սովը հնձում է :
Գիւղում ապրում է 1000—1200 շունչ գաղթական, իսկ բնակիչ գիւղացիք
2300 շունչ են : Հացի գինը բարձրացել է՝ 1 փութ ցորենը 300—400 ուրբու,
գարին՝ 200ռ., ձուն հատը 1ռ. 20կ., միւս մթերքները կրկնապատիկ և
եռապատիկ գին են ստացել, այն էլ ձեռք չի բերում» :

Նոր-Բայազէտի Քէօլաղուան գիւղից հեռագրում էին նոյն թերթին
(27 ապր.) : «Ժողովուրդը ապրում է սոսկալի պայմաններում : Սովամա-
հութեան դէպքերը տասնեակների են հասնում. օր օրի վրա սաստկանում է :
Ոնգրում ենք հաց : Ի սէր Աստծոյ, մի՛ թողէք մեռնենք» :

«Ախտայի շրջանի տեղացի և փախտական հայութիւնը ծայր աստի-
ճանի սոված է, հեռագրում էին Ներքին-Ախտայից, անհամար զիմումներ
կը լինեն : Սովամահութեան դէպքերը բազմաթիւ են : Եթէ անմիջապէս
նպաստ և սերմացու չհասնի, ուշ կը լինի» :

Քեչիչքեանդից գրում էին նոյն թերթին (9 մայիս) : «Սոսկալի
տեսարաններ... Գաղթականութիւնը նորից գաղթի ճանապարհը բռնած՝
չոււմ է դէպի Երևան : Մերկ, ոտաբորիկ կամ զանազան ցնցոտիներով իր
այլանդակ մարմնի մի մասը ծածկած և ծանրաբեռնած իր փոքրիկներով՝
գիւղից-գիւղ թափառում, հաց է մուրում, բայց հաց չի գտնում : Հացի
փոխարէն կանաչով սնուող գաղթականութեան մէջ յաճախ թունաւորման
դէպքեր են պատահում և կամ գժւածի նման թափառում են փողոցները՝
անկապ և կցկտուր խօսքեր արտասանելով : Շրջանիս գաղթականութեան մի
մասը դեռ մինչև օրս էլ բացօդեայ է անցկացնում իր օրերը ձիւնի, անձրևի
տակ և ցեխերի մէջ : Լինում են դէպքեր, որ սոված, ուժասպառ եղած
գաղթականները թաղւում են ցեխերի մէջ և առանց կողմնակի օգնութեան
չեն կարողանում աղաւթել այդ դրութիւնից : Աւելի սոսկալի և անելանելի
դրութեան մէջ գտնուողների մեծ տոկոսը կազմում է Նախիջևանի ժողովուր-
դը... Սովն ու ցաւը մէջք մէջքի տւած հնձում են 17,000 խեղճ գաղթակա-
նութիւնը... Պատահում են, յաճախ, մեռելներ, որոնք 6—7 օրով մնում
են գոմերի մէջ, առանց թաղւելու» :

«Կողբը սովի ճարակ է դարձել, ճշում էին աղահանքից («Հ. Աշխ.»
21 մայիս) : Հացի գրւանքան 15ռ. է : Նպաստ չստանալու պատճառով սովից
մեռնում են օրական 20 մարդ : Օգնեցէ՛ք մեզ» :

Ժողովուրդը սովամահութիւնից բնաջնջւեց, նորից աղաղակում էին
Ներքին-Ախտայից : Կմախքացած մարդիկ խոտ են ճարակում, սատկած լէշեր
ուտում գիւղերում : Հարիւրաւորներ մեռնում են : Շրջանը ձեռքից դնաց» :

«Քէօսամահմատ գիւղի մեծ մասը, հեռագրում էին մայիս 19-ին
Նոր-Բայազէտից, կանաչով է կերակրւում : Կանայք և երեխաները նման են
ուրակականների : Ի սէր Աստծոյ, փրկեցէ՛ք մեզ մեռնելուց. հաց հասցրէ՛ք» :

«Գաւառի և քաղաքի ազգաբնակչութեան վիճակը անտանելի է,
հաղորդում էր Հայ-Հեռ. Գործակալութիւնը մայիս 20-ին : Սովամահութեան
դէպքեր են եղել : Ամերիկեան կոմիտէն 10 օրից ի վեր ոչինչ չի ստանում :
Ալիւր չլինելու պատճառով ի դուր է մօտ ապաղայում ամերիկացիներից
որև է օգնութիւն սպասել» :

Եւ այսպէս անկերջ ու ամէն կողմից :